

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE PORTOMARÍN PARA O TRASLADO E OCULTACIÓN DE COLECTORES DE RESIDUOS SÓLIDOS URBANOS NA CONTORNA DA IGREXA DE SAN XOÁN DE PORTOMARÍN

O xerente de Turismo de Galicia

DECLARA:

Que esta Axencia de Turismo de Galicia formalizou co Concello de Portomarín o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2025.

Que o instrumento convencional ten por obxecto establecer o marco de colaboración entre Axencia de Turismo de Galicia e o Concello de Portomarín para o traslado e ocultación de colectores de residuos sólidos urbanos na contorna da igrexa de San Xoán de Portomarín.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



Segundo.- O Camiño de Santiago é a ruta de peregrinación máis importante do Vello Continente, encontro de culturas e orixe da unidade de Europa.

O Consello de Europa, na súa declaración do 23 de Outubro de 1987, manifesta que a dimensión do humano da sociedade, as ideas de liberdade e de xustiza e a confianza no progreso son principios que foron conformando historicamente as distintas culturas que integran a propia e peculiar identidade europea. Esa identidade cultural fíxose posible pola existencia dun espazo europeo cargado de memoria colectiva e cruzado por camiños capaces de superar as distancias, as fronteiras e as linguas. Que a fe que animou os peregrinos no curso da historia e que os xuntou nun alento común, por riba das diferenzas e dos intereses nacionais, nos impulse tamén nesta época, particularmente aos mozos, a seguir percorrendo estes camiños para acadar unha sociedade fundada na tolerancia, a liberdade e a solidariedade.

O Camiño Francés foi declarado o Primeiro Itinerario Cultural Europeo, Ben de interese Cultural e Patrimonio da Humanidade, e é a ruta máis transitada por peregrinos de tódalas nacionalidades, polo que necesita un valor máis alto de protección así como unha atención aos peregrinos continuada, sobre todo na época estival.

Por outro lado a igrexa de San Xoán ou San Nicolás de Portomarín ten a consideración de Ben de Interese Cultural coa categoría de monumento, a atópase situada xusto ao pé do Camiño Francés. É un magnífico exemplar de templo-fortaleza románico de finais do século XII e comezos do XIII.

A Axencia de Turismo de Galicia está, por tanto, interesada tanto na súa mellora e posta en valor, como na atención e coidado ao peregrino.

Terceiro.- O Concello de Portomarín, no seu propósito da posta en valor do patrimonio cultural existente e co fin de dalo a coñecer ás persoas visitantes que recibe, como un importante sector de desenvolvemento nas zonas rurais, propón a execución de actuacións de recuperación e mantemento en correcto estado de conservación de diferentes bens de interese patrimonial no interior do núcleo, de xeito que as condicións nas que se atopen sexan acordes ó medio onde se emprazan.

O Concello de Portomarín pretende levar a cabo as obras necesarias para o traslado e ocultación dos colectores de residuos sólidos urbanos situados actualmente na contorna



da igrexa de San Xoán de Portomarín, co conseguinte impacto negativo que isto supón, xa non só para o propio monumento, senón tamén para o Camiño de Santiago. No entorno do albergue de peregrinos existe unha zona con varios colectores sen ocultación. Preténdese, xa que logo, trasladar os ditos colectores desde a igrexa ata a contorna do albergue, ocultando esta illa de colectores con portas de panais de madeira no alzado principal, xa que o resta de alzados atópanse soterrados.

As obras que se desenvolverán son as que se describen deseguido:

- Acondicionamento do terreo

Demolición de muros existentes e movementos de terras, relativo a baleirado de terras e cimentación.

- Cimentación e estrutura

Proxéctase a construción dun muro de contención no alzado posterior, conectando os dous muros existentes. Inclúese cimentación do muro e soleira de formigón como plataforma

- Ocultación dos colectores

Sistema de ocultación composto por portas de paneis de madeira.

A Axencia de Turismo de Galicia está interesada en colaborar neste proxecto, que supón a posta en valor dos recursos turísticos do concello, o que tamén contribuirá á revalorización do turismo da Comunidade Autónoma e a necesidade de atender áreas con necesidades específicas para a posta en valor e humanización dos elementos patrimoniais do concello, ofrecendo aos visitantes e peregrinos produtos turísticos seguros, que incidirán na promoción e potenciación do turismo en Galicia.

Estas melloras inciden na promoción e potenciación do turismo en Galicia, non sendo posible promover a concorrencia, por ser o concello a entidade impulsora da actuación.

Con esta actuación preténdese potenciar un elemento patrimonial do concello, favorecendo o uso e goce do entorno por parte de veciños e visitantes, revalorizando o



patrimonio e fomentando o turismo patrimonial como un instrumento de reequilibrio territorial, o que supón a posta en valor turístico da citada infraestrutura.

Que a través deste convenio, outórgase ó Concello de Portomarín unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

